

國朝詩人徵略

國朝詩人徵略卷十六

番禺張維屏子樹輯

陳鵬年

字北溟號滄洲湖南湘潭人康熙三十年進士官
至河道總督諡恪勤有陳恪勤集

公長七尺美鬚髯性彊直成進士居五年授衢州
西安知縣初入官誓以清白自厲西安當耿賊亂
後民多流亡豪彊占田率數十百頃公履畝案驗
有主者悉還之三十九年河道總督張鵬翮請以
公試河工逾年題補天津同知引

見改授山陽知縣既抵官革耗羨汰胥吏逮淮關蠹役重懲之擢知海州旋擢知江寧府松江捕盜率誨盜誣富人爲黨掠其家逼婦女自經死旣成讞遇赦冀得脫公會訊白大吏曰誣良民盜卽盜也况又劫殺無赦理置五人于法會有大役總督阿山召諸屬官議增地丁耗羨公力爭且曰官可罷賦不可增也議遂寢自是大吏滋不悅公四十四年

聖祖南巡公辦行宮或求索不應竊置蚯蚓糞于簾席間聖祖召公詰問先是致仕大學士張文端進見

聖祖問江南廉吏文端以公對及是復問公爲人文端言

鵬年吏畏其威而不怨民懷其德而不玩士式其教而不欺廉其末也

聖祖遂釋然

駕臨金山觀水師先期一夕大吏檄公疊石爲步者三岔以困公公率諸子弟親運土石士民從者屬路爭徹屋材濟工鼓四下工竣

聖祖臨視益奇之其年六月以江南河牘事被議落職羈江寧武廟江寧人痛哭罷市大吏必欲殺公旣摺據無所得則以公嘗逐羣娼建亭其上月朔宣讀聖諭爲大不敬獄成論死

聖祖一日問大學士李文貞阿山在官何若文貞言廉幹
果于任事其失民心獨劾陳鵬年一事耳

聖祖頷之獄上

詔從寬免歿四十七年以兩江總督邵穆布請

命出知蘇州府蘇大饑且疫公于是議賑貸勸捐輸濬城

河修學宮剏義塾懲博塞禁婦女毋游觀公決斷

神速初至滯獄三百餘案不一月判結都盡四十

八年張清恪巡撫江寧倚重公大小事多與公裁

沒總督噶禮既與巡撫有隙忌公密奏公所作虎

邱詩謂爲怨望再罷職獄成復擬大辟五十一年

聖祖出公虎邱詩示近臣曰有密奏陳鵬年怨望以此作證宵人伎倆大率如此朕固不爲所動也明年

萬壽覃恩宥公臯旋

命爲武英殿纂修總裁官五十六年署霸昌道事六十年命公偕吏部尙書張鵬翮視南北河堤尋

詔公留河工其年秋河決武陟馬營日公請從洩口上流對岸廣武山下別開引河以殺水勢有

詔如公言冬奉

命署總督河道事公在官慎宣防嚴啟閉飭材料卹徒庸覈功罪信賞罰明年馬營再決公請于王家溝再

開引河使水趨東南入滎澤報可未幾奉

詔自工所還清江兼攝漕運總督時運道梗滯旂丁數千食不給呼號載路公立發帑金六萬賑之奏聞

聖祖曰諒爲大臣當如此矣秋八月再至武陟時決口尙未塞公爲文禱河神是夕河水驟退八尺再請開官莊峪引河報可日宿隄上往來風雪中遂得疾雍正元年正月五日方四鼓命具湯盥沐畢北面口占遺表天明端坐而逝年六十有一喪自武陟還過南北壩尾兵民繞棺哭者數萬人表聞下

詔憫悼曰此真鞠躬盡瘁死而後已者也

賜白金二千兩封其母曹氏爲一品夫人予其子一品蔭

謚恪勤江南人祀公名宦以配海忠介焉

二林居集

陳滄州先生守蘇州重遊虎邱詩云雪艇松龕閑
歲時廿年踪跡烏魚知春風再掃生公石落照仍
銜短簿祠雨後萬松全還匝雲中雙塔半迷離夕
佳亭上憑闌處紅葉空山繞夢思塵鞅刪餘半晌
閒青鞋布襪也看山離宮路出雲霄上法駕春留
紫翠間代謝已憐金氣盡再來偏笑石頭頑棟花
風後遊人歇一任鷗盟數往還其時總督噶禮以
詩爲誹謗句句旁註而劾奏之摘印下獄

聖祖詔云詩人諷詠各有寄托豈可有意羅織以入人罪

命復其官

隨園詩話

摘句 山色分吳楚江流自古今春風滿天地無

限望鄉心

禁闥似聞憐讜直湖山自合老漁樵

畧記年時春雨後海棠初試小熏籠

惠周惕

字元龍號研溪江南長洲人康熙三十年進士官

密雲縣知縣有研溪詩集

惠氏三世以經著周惕其剏始者也

四庫提要

研溪令密雲邑當出關孔道值軍需旁午馬瘡僕
痛卒憂懣以死昔劉須溪謂士方少時志科舉辛
勤過人不知心血之耗及其得也或陸沈州縣或
流落邊塞坐念塲屋何心至此今觀研溪之才與
其末路之蹭蹬追誦前言可爲雪涕

國朝名
家小傳

研溪家有紅豆書屋子士奇字半農亦以經學著

世稱研溪老紅豆先生半農小紅豆先生

文學
錄

摘句 饑寒逼腐儒顛倒作奇想

人生冒眼不自見願以妍醜煩青銅

旅舍一涼來好雨竹牀昨夜夢青山

歲寒惟爾堪相倚忍爲豐貂易素心 傲裴

黃叔琳

字崑圃直隸宛平人康熙三十年

賜進士第三人官至吏部侍郎

侍郎年十九登第後庚午辛未諸舉人進士兩詣

其第稱後同年讌會誠

熙朝盛事云 國朝詩別裁

崑圃先生主持風雅人有一技一長必爲揄揚無

須識面 隨園詩話

辛未重赴瓊林詩曰天鼓聲喧曉漏餘春風吹雨

酒庭除婆娑老眼看新榜
髣髴青雲接敝廬
鶴返故巢無宿侶
花開仙洞見新枝
輶軒南國追疇昔
風雨橋山愴夢思
先生巡撫浙江追感

兩朝恩遇故詩中及之

同上

標題

觀李晉王畫像歌

七古

摘句 花下迎親依曉簪
尊前憶弟夢春池

高孝木

字大立號青華浙江嘉興人康熙三十年進士官
績溪縣知縣有固哉叟詩鈔

孝本雖年屆四十始爲詩然罷官後放浪山水以

老故其詩灑落有清氣但深厚不足耳

四庫提要

摘句 二十八潭水五千餘仞峰

華山

峽斷疑無路灘高欲到天

萬安

九曲初通三島近萬山遙拜一峯尊

武夷

姚士陞

字別峰江南桐城人康熙三十二年舉人有空明

閣集

別峰少隨父宦秦越得朋友江山之助其詩不名

一家而緣景會情曲折善肖同里張文端公偶携

其詩至直廬時澤州陳相國華亭王司農靜海劉

司寇皆擊節稱賞交口呼才子不置

國朝家小傳

摘句 早笑負薪廉吏後重來衣葛故人前

自笑欲歸歸未得也將歸信卜燈花

吳文煒

字山帶廣東南海人康熙三十二年舉人有金茅

山堂集

山帶家藏書甚富朱竹垞遊粵將歸山帶作墨卷

子贈其行並題句云未得便留山屐駐羅浮晴看

紫籠葱論者謂不減徐文長風韻

廣東通志

摘句 親在未可死中宵幾淚盈亦知齊物理何

事感餘生

顧圖河

字書宣江南江都人康熙三十三年進士官翰林院編修有雄雉齋集

圖河爲江左十五子之一其詩古體多學眉山近

體多學劔南

四庫提要

書宣入史館不數月卽乞假歸泉明琴酒謝傅裙

屐陶然自樂十年乃復來京供職

國朝名
家小傳

圖河預纂修一統志旋覲學湖北未幾卒

文學
錄

摘句 保國釋外懼攝生留小疾

百慮輸一忘百巧輸一誠

詩興復不淺梅花何太遲由來孤賞意不
在滿開時

陳 璵

字文煥號眉川廣東海康人康熙三十三年進士
官至福建巡撫諡清端有清端集

璵成進士授古田令調臺灣行取授刑部主事遷
本部員外郎又遷郎中四十八年充會試同考官
出任四川提學道福建巡撫張伯行奏請以璵爲
臺灣廈門道璵以興化易俗爲先率之以廉衣御

布素食無兼味五十三年超擢巡撫入見

聖祖目之曰此苦行老僧也至閩疏言臺廈防海必定會
哨之期申護送之令取連環之保今令水師哨船
書某營某哨於旂上每月會哨一次彼此交旂爲
驗若無哨旂交驗卽取其營官職名某月海洋有
失事卽取巡哨官職名則會哨之法行矣商船候
風順齊放二三十船臺廈兩汛各撥哨船三四護
送至澎湖交代各取並無疎虞甘結則護送之法
行矣各商船取連環保若遇賊必首尾相救如不
救卽以通同行劫論則連環保之法行矣

是璜所奏如所請行是年兼攝閩浙總督五十六

於官年六十有三追授禮部尚書

廣東通志

康熙五十四年十二月初五日奉

旨調福建巡撫初六日公跪請

聖訓

上垂詢周詳又問福建有加耗麼公奏臺灣三縣征收錢糧沒有火耗

上云加耗原不好若禁絕了恐州縣官又別生弊端取錢從前各州縣有存留一項銀兩公費尙有出處後議將存留銀兩盡歸戶部州縣費用無所出若將

加耗盡禁分毫不許恐行不去

上云做清官固是好但要替朝廷辦事纔好若止硜硜自守亦有何益初八早蒙傳進 暢春園

上云汝請訓昨日都說過了汝照着行就是做清官固是好但恐清而刻人便不能相安要清而不刻爲好

陳清端
公年譜

前明海忠介公直聲清節震耀宇內後百餘年而國朝陳清端公繼之忠介之意必欲事事復古清端則相時度地惟期實政足以利民忠介之清主乎肅清端之清兼乎溫清如冰霜足以殺物清如雨

露足以生物故學忠介而不至其弊恐流於刻

清端而不至或猶不失溫厚之意與

聽松庵文鈔

摘句 交遊傳死別家室憶生離

別緒迷燈影歸心付酒罇

最迄終日長無事埽地焚香讀道書

朱軾

字若瞻號可亭江西高安人康熙三十三年進士
官至大學士諡文端有朱文端公集

若瞻忠信好學佩服經訓達于政事康熙末巡撫
浙江以身教儉雍正三年拜文華殿大學士時

世宗銳意圖治綜核名實若瞻在左右因益以知四方疾苦人材賢不肖營奉

命視賑山西還奏天下倉儲虛耗請

飭督撫勒所屬買補缺額爲荒備乾隆元年八月卒豫草遺疏言國家萬事根本理財用人而已臣查額征所儲于一切經費寬然有餘倘日後有言利之臣倡爲加增之說仰祈

聖明乾斷力斥浮言至於用人邪正公私幾微之際最易混淆尙書逆于汝心遜于汝志二語願

皇上時以爲念則臣魂魄長逝永無遺憾

謝海集

摘句 光風霽月君新領古檜蒼松地舊栽

洪鐘時一叩不教庭廡翳莓苔

呂履恆

字元素號坦菴河南新安人康熙三十三年進士官至戶部侍郎有夢月巖集

凡例稱其詩或經歲一改或一月數改

四庫提要

少司農詩不落唐以下

國朝詩別裁

摘句 風雅以還兼正變懷襄之際獨憂勞

屈原

讎國稱臣緣底急同盟歸妹却相傾

孫大帝廟

山餘落日千峰紫海瀉遙空一氣青

山海關

國朝詩人徵略卷十七

番禺張維屏子樹輯

高其倬

字章之號芙沼又號種筠漢軍人康熙三十三年進士官至戶部尙書諡文良有味和堂集

康熙五十九年章之以內閣學士出爲廣西巡撫鄧橫苗叛章之單騎入寨諭以

朝廷威德衆棄刃羅拜受約束而還

世宗登極遷雲貴總督時用兵西藏章之以中甸爲進藏咽喉地請調鶴麗劔川兵鎮之墾田陸涼州積穀

以備運改哀牢土司爲流官苗人蠢動章之遣兵
迎勦大小三十二戰平魯魁茅洞諸寨逆渠次第
就擒雍正三年調浙閩總督時福建饑章之入浙
境卽請撥溫台倉穀七萬石運閩寬臺灣米禁以
濟漳泉閩人大安移興泉道駐廈門設哨船彈壓
苗夷平生番阿密氏之亂八年調南江總督雲南
普思苗反貴州廣西猺獞多響應九年奉

命總督三省率提督蔡成貴等討平之章之爲人淵深凝
重治事勤與人恕屬吏有才者往往代爲受過累
任盤錯不喜功不釀亂所至人咸懷之

測海集

自序謂作詩存稿始於萬柳塘篇有白蘋風細魚

苗長紅杏花深燕子低之句爲友人所賞

八旗通志

文良公詩爲勲業所掩不知一代作手直駕新城

而上

隨園詩話

高文良公勲業顯著而其詩乃云詩外更無餘事
業酒邊時作小淹畱想其天懷高曠不居成功有

古人敦詩說禮雅歌投壺氣象

聽松廬詩話

標題

南天門

五古

薊州新城

五古

碧雲寺

五古

喀喇河屯

七古

蟠龍山頂望都城

七古

摘句

慈親起送我語好顏色悽愛我不便哭願

我平安歸

從來守邊術能戰守可說更有必勝方千
古同一轍赤子付龔韓白麻命蕭葛
夢回仍遠塞月好是殊方

未霜先見雪每雨卽兼風

宴罷白沈千帳月獵回紅上六街燈

酒狂尙憶同諸子詩瘦無妨自一家

風鐸閒同山魅語鬼鐙紅出寺門遊

晴空黑過盤鵬影低草腥畱臥虎痕

蘚碑遺字零星綠戰壘秋陽寂寞紅

長河暫伏潛仍出高嶺遙看到却平
纔穿雲過捫衣潤欲覓詩行任馬渥
朱旗颭地親麾陣蠻甲齊山坐受降
意中故國偏無夢風裏銀河似有聲
天涯日日思歸日覺有歸期日倍長

覺羅滿保

字九如一字鳧山滿洲人康熙三十三年進士官
至閩浙總督有檢心堂稿

滿保總督閩浙朱一貴之亂滿保謂撫臣呂猶龍
曰廈門爲控制全臺咽喉當親往以安人心乃移

駐泉州至廈門申嚴軍令命諸將令攻鹿耳門旬

日而復府治以次討平臺灣遂定

大清一統志

摘句 雲連三省近關踞萬山高

仙霞關

峽陡人多瘦江清月自閒

雲中山養勢雨後水添聲

經歲誰憐農父老辛勤一半代牛耕

法海

字淵若號陶菴滿洲人康熙三十三年進士官至

兵部尙書有悔翁集

淵若咏鶴詩通體自寫懷抱風骨獨高

國朝詩別裁

陶菴尙書句云自謂侍臣趨直早不知深殿已

宵衣國朝

家法之善

莅政之勤實足度越千古比隆三代誦尙書此詩益令人

職思其居不敢懷宴安之念也

松心
目錄

摘句 片語亦有味不必在盡言

生成雲水性偶與鳳鸞羣

詠鶴

久陰天氣憐芳草望月人心愛晚晴

周起渭

字漁塘號桐野貴州貴陽人康熙三十三年進士

官詹事府詹事

聖祖仁皇帝嘗以後進詩人詢澤州陳廷敬廷敬以史申

義周起渭對

四庫提要

貴州遠無從蒐羅故祇采漁璜前輩

國朝詩別裁

輦下人文極盛桐野異軍特起拔戟自成一隊江

都史蕉飲贈句云孰與夜郎爭漢大手攜玉尺上

金臺若是乎傾倒之深也

國朝名家小傳

標題 赤壁登蘇公亭放歌

七古

摘句 何處無北牕臥者少真淳胸中失佳趣几

榻俱埃塵

北窓高臥圖

花霧陰時迷笛浦柳烟開處見漁村
啼鶯過水仍棲樹乳燕銜泥半帶花

黃利通

字曉夫號梧岡一號懷亭湖北黃梅人康熙三十三年進士官工部主事有石亭集懷亭集

利通授廣西賀縣知縣會征八排猺人獲猺子房

十一等親解軍門并上平猺策

黃梅縣志

竊謂平猺大計在兼用鄉兵尤在以猺平猺獲一
猺卽以恩結之用爲嚮道用爲間諜諭以順逆禍
福頭目中有舉衆來降者卽畀以爵賞衆猺必自

相攜貳然後攻一排而衆排落膽降一排而衆排
歸心矣平獠之後又在乎以獠治獠莫若建立土
州縣而總制于流官其有粗解文義者卽選補諸
生鄉場另編字號懸功名富貴之途以潛消其鬪
悍難馴之氣不出數年獠人猶吾人也

懷亭文集

不肖一第後出宰賀縣吾父五官未衰攜送河澣
垂示官方觀者稱慶在賀頗聞家耗心動欲歸適
王師征蠻不敢以私請罷兵後上官檄取同考又
不敢以私請闕事竣乃具詳終養又以格於成例
請至數四不允甲寅奉文入爲部曹私喜問道歸

里父子重逢詎知撫軍咨部之日卽吾父棄世之日而河干出祖之地遂爲幽明永訣之地耶同上

道光壬午屏倖捷禮闈蒙

恩以知縣卽用籤掣湖北五月出都擬到楚將部文投遞卽請歸養乃抵楚數日奉檄入闈九月文闈事竣又奉檄武闈至武闈事竣具文詳請巡撫楊公云君辭官歸養吾非必欲強留惟家有次丁與告養之例不符且現當題補長陽身入仕途不能徑行已意矣十一月總督李公莅任謂屏宜練習吏治卽檄署黃梅縣事梅號衝繁春夏間遲羅貢使

過境兩次癸未五月江水大溢堤潰災黎在野者
數萬在城者數千大府奏請

帑賑於是梅邑勘災辦賑之員自方伯而下至巡檢
凡三十餘人自五月至於九月屏艱險備嘗幸免
罪戾而公私逋負欲歸不能迨丙戌冬遽遭吾父
大故終天之恨曷其有極讀懷亭先生告墓文不

禁潛然涕泗之交集也

聽松廬
文鈔

摘句 豈是昌黎能格帝偶然衡嶽一開雲

有酒真須慚父老無詩何以答雲山

政拙難爲知己告官貧但取故人憎

自從墮地名爲累剛說圖閒夢已虛
今我心還同故我舊人色似勝新人
可惜東林都不省無關社稷只捐生

焦袁熹

字廣期江南華亭人康熙三十五年舉人有此木
軒詩

春秋闕如編焦袁熹撰袁熹是書酌情理之平立
褒貶之準謹持大義而刊削煩苛近代說春秋者

當以此書爲最

四庫提要

摘句 中心壹鬱不能長歌拍肩何限知心不多

羣仙列真遨遊無垠我聞其語未見其人

許遂

字揚雲廣東番禺人康熙三十五年舉人官知縣
有真吾閣集

授江南清河力請蠲逋賦凡興作便民者輒爲之

以事望吏議去職杜門著作名益起會開鴻博科

巡撫楊永斌薦之以格於部議不得與試

廣東通志

山月一律選本多同余別蒐其佳句錄之

聽松廬詩話

摘句 潮長全低樹帆高欲過山

孤磬入雲雙洞響百花臨水一溪香

多情垓下辭虞女大度鴻門釋沛公
忍見柳條相贈處故鄉人別異鄉天

嚴虞惇

字寶成號思菴江南常熟人康熙三十六年
賜進士第二人官太僕少卿有嚴太僕集

讀詩質疑嚴虞惇撰大旨以小序爲宗而參以佳

傳亦有虞惇自爲說者

提要 四庫

摘句 正是空江明月夜相逢尊酒落花時

姜宸英

字西溟號湛園浙江慈谿人康熙三十六年

賜進士第三人官翰林院編修有湛園集

其文閎肆雅健往往有北宋人意

四庫提要

姜宸英以詩古文馳譽江表用薦入史館食七品俸未授官年七十始捷南宮殿試進呈名稱殿

上問十卷中有浙人姜宸英乎大臣有識其字蹟者謂

八卷當是

上云宸英績學能文至老猶篤可拔置一甲爲天下讀書人勸遂以第三人及第先生嘗謂我輩人人有集然詩傳與否未可知惟當連綴姓名於集中幸有

傳者卽附載之人亦因以顯

國朝名
家小傳

讀書不須務多但嚴立課程勿使作輟則日累月
積所蓄自富古人讀一書必思得此一書之用至
於終身守之不失如此雖欲多不得也

洪園未定稿

標題

觀洗象

七古

摘句

鳥隨碧天盡水將銀漢通

千里江東羞不渡六朝曾此作金湯

烏江

汪士鋐

字文升號退谷江南吳縣人康熙三十六年會試
第一官右春坊中允有秋泉居士集

退谷中年後書益沈著詩未多見

松軒隨筆

摘句 大兒讀書如養苗勿忘勿助不敢握小兒
讀書心孔開惟恐鹵莽與滅裂主人有田
復有兒書味酒香滿一室呼童留客唱田
歌田家之樂樂如何

陳 棻

字玉文號雪川江南吳江人康熙三十六年進士
官桐廬知縣有雪川集

潘稼堂云玉文嗜古學其人其詩與江水同清庶
可拜嚴祠而無愧矣

江蘇詩徵

標題

臨終詩二首

五古

摘句 秋從黃葉聲中老人向青山缺處行

春風隴上新寒食夜雨堂前舊鏡臺

悼亡

自愧不如閒草木年荒猶得療人飢

宋聚業

字嘉升江南長洲人康熙三十六年進士官吏部

郎中有南園藁

南園以剛直觸忤年制軍其人足重可知

江蘇詩徵

摘句 夢隨天共遠人與序俱分

秋分夕

真人白水生文叔名士青山卧武侯

南陽

陳至言

字青崖號山堂浙江蕭山人康熙三十六年進士
官翰林院編修有青苑堂集

毛奇齡稱其能守古人三義八法之意而不變今

觀所作音繁節壯頗似西河集中語

提要 四庫

摘句 萬壑收江雨千花護佛燈

千金生季布一諾死臧洪

沙苑馬肥青苜蓿涼州人醉綠葡萄

殘雨白遮雲外樹落霞紅帶晚來潮

冷垂串串玲瓏雪香送絲絲麗穀風

白丁香花

國朝詩人徵略卷十

番禺張維屏子樹輯

鄂爾泰

字毅菴滿洲人康熙三十八年舉人

乾隆二十九年太學士

謚文端有西林遺藁

毅菴性明決威重勇于任事知人善任使雍正初授雲南巡撫先是雲南貴州廣西三省羣苗屢煽動毅菴奏欲保百年無事非改土歸流不可欲改土歸流非大用兵不可奏上

世宗大悅鑄三省總督印授之毅菴奏遣張廣泗等先後

進剿累奏捷歲庚戌造橋雲貴之交號庚戌橋開
通滇黔路八百餘里封襄勤伯授武英殿大學士
毅菴督三省時扶植善類及爲相益自任進賢退
不肖士有學行者多以禮進之乾隆十年薨配享

太廟

測海集

公刻南邦黎獻集沈歸愚與其選後此本進呈

御覽沈之受知從此始也

隨園詩話

摘句 曠達不敢出激烈非所安

百年元是客萬里獨登臺

手理亂絲須用緩方醫惡疾不妨奇

四千四百有奇卷二十二人同此心

闕中述懷

除却詩篇何所癖獨於山水不能廉

從知三萬六千日半是東西南北人

垂老餘功惟補過多生結習賸憐才

張遠

字超然福建侯官人康熙三十八年鄉試第一官

祿豐知縣有無悶堂集

詩近元白長慶體在晉安詩派中爲別調

四庫提要

遠避逆藩亂僑寓常熟閒至西江題詩滕王閣侍郎曹溶持節過而嗟賞所至爲延譽詩名遂振遠

嘗言閩越自林子羽以平澹之詩鳴嚴滄浪高廷
禮先後唱爲盛中晚之說習以成風後之作者襲
其膚淺浮泛之詞如出一律自束其性情以步趨
唐人之餘響其不振也宜哉故其詩遙情逸氣頓
挫瀏漓獨能拔出閩派之外

東越文苑傳

摘句 前舟歛然沒初見各驚詫須臾出白浪迴

旋去如射生命寄柁師與石爭一罅

建溪諸灘

一年一萬一千里馬足車輪舴艋舟自笑
此身渾似葉不知於世復何求

梁澤

字珩白一字采山廣東順德人康熙三十八年舉人官海鹽知縣

一時名碩多出其門如陸公奎勳杭公世駿桑公調元其最著者乾隆己卯重燕鹿鳴其配尙朱顏紺髮環列孫曾殆文人之饒於福命者也

嶺海詩鈔

摘句 奸雄未解尊王室堯舜何曾築禪臺

鄴中

劉信烈

字直庵廣東香山人康熙三十八年舉人官知縣直庵五十餘尙無子奉檄運糧軍前邊塞風沙中

能作壯語足稱健者

聽松廬詩話

摘句 紫塞東南通韎韞黑山西北走居延

吾道信能行異域 盛朝原不廢邊防

花胡

都克道中

汪 繹

字玉輪號東山江南常熟人康熙三十九年

賜進士第一人官翰林院脩撰有秋影樓詩

殿撰於臚唱日馬上得句云歸計未謀千畝竹浮

生只辦十年官癸未假歸未十年卒

國朝詩別裁

本朝補殿試得一甲一名者未之間汪東山其一也

槐廳載筆

古事多荒幻不足信然直說破轉無味余愛李義
山詩云八駿日行三萬里穆王何事不重來又汪
東山詩云神仙不作兒孫計一任張巡慟哭來如
此論古乃覺婉而多風

聽松廬詩話

摘句 秋風鱸膾江南味春雨梅花處士魂

桃源自是人間世却遣童男問海山

滿眼兒孫滿簷日飯香時節午雞啼

張廷玉

字衡臣號硯齋江南桐城人康熙三十九年進士
官至大學士諡文和有澄懷園集

康熙丙戌分校春闈有同事以微詞探余余知其意因作闌中對月絕句有云簾前月色明如晝莫作人間暮夜看其人覽之慚而退

澄懷
園語

廷玉在直廬辦事

帝命內侍傳

諭曰爾子張若靄取中探花矣特告大學士知之廷玉聞旨免冠叩首懇辭數四內侍傳奏未蒙俞允廷玉奏請面見仍免冠叩首奏曰臣家世受

皇恩無所不極其至臣子若靄又占科名最高之選臣實夢寐難安願讓與天下寒士

憲皇帝憐其愚忱乃命改爲二甲第一名

澄懷園
文存

憲廟賜廷玉春聯曰天恩春浩蕩文治日光華

茶餘
客話

雍正癸卯四月

特恩開科張文和以禮部尙書主試是年九月會試又奉命爲正考官有恭紀詩云兩番鎖院秋兼夏一室掄才弟

與兄公弟廷璐亦與分校鎖闈佳話也

聽松廬
詩話

摘句 寄語功名人進取休太疾早榮亦早枯易

得還易失

陸魯望張志和朝朝詩思在烟波吾曹不

解工吟咏醉唱義皇網罟歌

陸師

字麟度浙江歸安人康熙三十九年進士官宛寧道有玉屏山樵集

師補江南儀徵多惠政二年以課最行取

湖州府志

清乃居官分內事清而不勤其弊有不可勝言者矣陸麟度詩云黃昏縱謝四知金白日虛糜五斗

粟此語足爲廉吏而素餐者倣也

聽松廬詩話

摘句 親亡焉用祿涕泗誓諸墓此意愧未堅又

被微名誤

無端一物交倏爾兩念起因兩遂生萬紛

紘不可紀

問渠何法牛馴擾鞭撻無驚芻牧多

許迎年

字毅士一字荔生江南江都人康熙三十九年進士官中書有槐墅詩鈔

配徐淑則互相酬唱藝林比之秦嘉夫婦

國朝詩別裁

摘句 花殘幽砌堆紅雪鶯坐垂楊破綠煙

春掩重門人寂寂落花和雨下池塘

楊守知

字次也號致軒浙江海寧人康熙三十九年進士

官平涼知府有致軒集

致軒爲雍正孫與沈樹本陸奎勳柯煜齊名

松軒隨筆

鮐答似石非石禱雨立應番人云龍精遺草樹間

牛馬食之則孕此致軒有詩甚詳

聽松廬詩話

摘句 射虎何曾侯李廣牧羝幾欲老蘇卿

早知靈運難成佛誰信曾參不殺人

不計輸贏粗了局略知甘苦莫言醫

別路與誰同悵望春空無汝不風流

詠柳

徐昂發

字大臨江南長洲人康熙三十九年進士官翰林

院編修有畏壘山人詩集

畏壘筆記徐昂發撰皆採掇舊聞斷以己意正舛

訂譌頗資聞見

提要 四庫

畏壘五言古從杜陵出近體得力樊南

國朝詩別裁

先生宮詞百首遍播旗亭酒社間既登上第膺華

選章貢甌越之區爾操文柄

國朝名家小傳

標題

雁門關

五古

彭蠡湖

五古

漱玉亭

五古

摘句

一身與雲輕迥出天地外

刀圍玉帳觴公瑾花簇珠屏舞大喬

吳桓王

草木尙生無慮子男兒那作可憐蟲

查嗣琛

字德尹號查浦浙江海寧人康熙三十九年進士

官侍講有查浦詩鈔

查浦與兄初白酬倡斐然可觀俱成進士同館十年歸里未幾而家難作闔門三十口悉付詔獄賴

仁聖竟從寬典查浦長流陝右

國朝名
家小傳

摘句 身逢明主猶嗟命天奪中年亦忌才

賈太傅祠

七分花臘三分葢正是梅開最好時

徐永宣

字學人江南武進人康熙三十九年進士有茶坪

詩稿

茶坪天爵自貴不就選人詩得力於東坡

詩別裁國朝

茶坪成進士策名已及而意不欲出曰吾姑歸里

讀書更十年而後仕未晚嗟夫世人皆以進士爲

讀書之終茶坪獨以進士爲讀書之始其志向居

何等也

國朝名家小傳

摘句

船泊荻花全白處酒沽楓葉半紅中

鄉曲公隣楊狗監天涯吾悼李龜年

已分孤臣傷骨鯁可禁衆女嫉蛾眉憐才

只有宣仁語千載追尋五夜悲

祀東坡先生

學道著書無箇事滿庭黃葉對秋山

訪竹垞

蔡 瑩

字鉉升號甘泉江南江寧人康熙三十九年進士官知縣有香草堂集

瑩年十三作明妃曲句云一出玉門烽火息秋風

何事慙琵琶爲杜子皇所賞

江蘇詩徵

瑩爲祖庚子家有懶園名流多觴詠其中

松軒隨筆

摘句 悲銜白帝生睽隔恨切蒼梧死別離環珮

不歸清夜杳月明無主照荒祠

蠓磯孫夫人廟

震

字起雷號狷亭江南吳江人康熙三十九年進士
官給事中有微塵做帚二集

狷亭先生自幼至老左圖右史性好山水作令川
南視學山左所至莫不登臨憑弔生平力闢二氏

不爲所惑

江蘇詩徵

詠雲詩如王荊公句云誰似浮雲知進退纔成霖
雨便歸山美之也又宋人句云無限旱苗枯欲盡
悠悠閒處作奇峰責之也汪東山句云閒雲莫戀
山頭住四海蒼生正望恩勉之也陳狷亭句云却
怪紛紛頻出岫不會行雨竟空還諷之也用意不

同各有其妙

聽松廬詩話

摘句 高峰猿嘯重雲裏絕壑舟行亂石中

黃任

字莘田福建永福人康熙四十一年舉人官四會知縣有香草齋集

其詩源出溫李往往刻露清新別深懷抱

四庫提要

莘田七絕秀韻獨出兼饒逸氣莘田豐髯秀目工

書好客談嘲談笑一座盡傾罷官歸隱裝惟端石

數枚詩東雨牛腰而已有硯癖自號十硯先生侍

兒金櫻明豔絕世妙解文翰兼工絲竹

榕城詩話

莘田黠體尤擅場細膩溫柔感均頌豔

國朝名
家小傳

任與同郡內閣學士謝道承順天府丞余旬周紹

龍奉天府丞陳治滋御史吳文煥南安知府游紹

安行人劉敬與同知郭起元通判林正青舉人郭

雍等數唱和年八十餘卒

東越文苑傳

陳句山先生云余書因謝以變余詩因黃以力朋

友之益也黃謂莘田先生

松軒隨筆

余舊題莘田先生香草齋集一律云香草風騷本

正聲當年壇坫想榕城一官澹似雲無迹七字溫

如玉有情

集中詩七
言尤工

清福况能兼豔福後生何敢

望先生

昔伊墨卿太守以夏承碑見贈并跋云此香草齋中物南山爲粵之莘田故以贈之

秋江秋水同傷逝

秋江莘田先生集名獨撫牙琴秋水墨卿太守園名

感歎并

聽松廬詩話

莘田先生絕句余愛誦之偶錄數首于此珍重遊

人人畫圖樓臺繡錯與茵鋪宋家萬里中原土博

得錢唐十頃湖

珠襦玉匣出昭陵杜宇斜陽不

可聽千樹桃花萬條柳六橋無地種冬青

西湖雜詩

百折紅闌不見人小池風皺綠鱗鱗夕陽大是無

情物又送牆東一日春

橘花和露落青苔鏡檻

無風暗自開涼月不知人已散殷勤猶下畫簾來

春思

行人莫折柳青青看取楊花可暫停到底

不知離別苦後身還去作浮萍

楊花

常參班裏

說歸休都作寒暄好話頭恰似朱門歌舞地屏風

偏畫白蘋洲

戲示僚友

又與殘編續舊情呬唔深夜

一燈明侍兒竊指乃翁笑四五年來無此聲

雜詩

不須惆悵惜芳叢把酒看花興未空看到秋江

顏色好芙蓉原不要東風

對花

舊時節序舊亭

臺散盡歡娛獨自哀我亦譬如騎竹日所思人本

不曾來

所思

老人情性多傷感到處歡場總不

宜賓客漸稀兒女畱來知有柳花詩

東蘭女此先生次

女佩紉工詩陳句山太僕愛其詠梅句風定月斜
霜滿地西廊人靜一聲鐘謂謝女柳花詩不過是

香臺鏡檻三千牘帽影鞭絲四十年無可思量

無可說東風吹夢夕陽天偶作其已見榕城詩話

者茲不具錄聽松廬詩話

標題 般若臺篆字歌七古 拜石齋先生墓下五古

築基五古 賑粥五古 棄婦辭七古

摘句 常恐瘦形骸高堂夢裏看知我未歸去老

淚不肯乾器業無成就強慰其實難明發

不得寐結愴摧心肝

露螢不自夜風樹欲先秋

先世只知安誦讀後人何必問田廬
行義艱難居下位別情哀樂感中年
不去自知無補益初來便信有泥塗
美人環佩惟蘭杜公子衣裳在芰荷
腸成寸寸迴文錦淚是星星記事珠
亞字疎簾丁字檻十分明月五分春
叩戶每來難記客他邦偏住所思人
老似嬰兒妨飲食貧如禁體作文章
林泉有福終能老文獻無徵要此身
消息早曾吾輩覺盛衰偏在故人多

忽逢異地多聞客如讀生平未見書

周大樽

字冷泉廣東南海人康熙四十一年舉人有乳峰

堂集

大樽孤雲野鶴隨心去畱人莫測也

粵東詩海

摘句 物性各有短所短亦未非貧女不得嫁自

然寡容輝

蘭若生幽谷本不希朝陽偶與採擇違悠

然舍其芳美人恐遲暮君子非所傷

葉適

字西邨廣東歸善人康熙四十一年舉人官教諭
有西邨集

西邨爲明少保龍塘公裔孫文章行誼卓然不羣

詩游心於石湖劍南之間

國朝詩精華

摘句 巖倚枯藤雲共臥石攤殘卷鶴同看

酒曾罵坐狂多悔詩欲驚人癖未除

每乘月色連宵出特爲梅花破曉行

雞聲亂柝收鄉夢樹色初陽人馬鞭

汪後來

字白岬號鹿岡廣東番禺人康熙四十一年武舉

人官千總有鹿岡集

後來性高介晚年倡詩社汾江遠近名士多仰爲

職志尤擅於畫著有杜詩矩

廣東通志

陳狷亭淫祀歎有云試復計所費大抵終年糧轟
然鼓吹作巫語聲琅琅汪白岵木居士詩有云覲
巫多巧借魑魅輒依伴拜跪苦擠挨魚羞競鮮粲
信巫佞鬼習俗多同糜費無益可歎也

聽松廬詩話

摘句 怒蛟爭砥石孤塔浸寒雲

夜半詩成攜稿入營門驚道羽書來

國朝詩人徵略卷十八

國朝詩人徵略卷十九

番禺張維屏子樹輯

查慎行

初名嗣璉字夏重後更今名字悔餘號初白浙江
海寧人康熙四十二年進士官翰林院編修有敬
業堂集

王士正序稱黃宗羲比其詩於陸游士正則謂奇
創之才慎行遜游縣至之思游遜慎行又稱其五
七言古體有陳師道元好問之風今觀慎行近體
實出劍南但游善寫景慎行善抒情游善隸事慎

行善運意故長短互形士正所評良允至於後山
古體悉出苦思而不以變化爲長遺山古體具有
健氣而不以靈敏見巧與慎行殊不相似核其淵
源大抵得諸蘇軾爲多觀其積一生之力補註蘇
詩其得力之處可見矣明人喜稱唐詩自

國朝康熙初年窠臼漸深往往厭而學宋然粗直之
病亦生焉得宋人之長而不染其弊數十年來固

當爲慎行屈一指也

提要 四庫

補註東坡編年詩查慎行撰考核地理訂正年月
引據時事元元本本無不具有條理非惟邵註新

本所不及卽施註原本亦出其下

同上

恩賜鮮魚慎行賦詩恭紀有句云笠簷蓑袂平生夢臣本

烟波一釣徒詞意稱

旨忽奉內侍召烟波釣徒查翰林蓋同時有聲山學士故

以詩別之此與唐韓翃春城無處不飛花可同作

玉堂佳話也

槐塘詩話

梅村後欲舉一家列唐宋諸公之後者實難其人

惟查初白才氣開展工力純熟鄙意欲以繼諸賢

之後

歐北詩話

初白詩功力之深香山放翁後一人而已

同上

放翁多自寫胸臆非因人因地曲折以赴初白則
隨事隨人各如其量肖物能工用意必切其不如
放翁之大在此而較放翁更難亦在此同上
兩浙輜軒錄引杭州府志云查慎行以大學士李
光地薦入直

南書房當日李文貞薦舉賢才不一其人而查初白

實由京江相國張文貞所薦見初白詩自註

松軒隨筆

初白先生詩極清真極雋永亦典切亦空靈如明

鏡之肖形如化工之賦物其妙只是能達

聽松廬詩話

查悔翁於人物理閱歷甚深發而爲詩多所警

悟余每有味乎其言 局外人不知局中之難每

好爲議論悔翁詩云事外易持議引喙多激昂設

身處局中唯阿無一長 人每好炫己之長訥人

之短不知己所謂長亦未臻其至也悔翁詩云域

內有名山攀躋力可至人皆造其麓抑或半嶺廢

等是未登峰毋爲笑平地 春陽之溫秋霜之肅

大造順其氣之自然未必有心也悔翁詩云開亦

勿德雨謝亦勿怨風榮枯雨適然了不關化工化

工倘狗物無乃與物同 形薪也神火也形未有

不盡者所賴者神存耳立德立功昭垂不朽此神

存之大者卽數卷之書數字之詩流傳世間在人
心目亦神之存也悔翁詩云養生徒養形木寇膏
自煎是形無不盡薪盡而火傳 無我則公有我
則私甚至知有我不知有人則其患不可勝言矣
悔翁詩云胚胎互融結大患緣有我 崇高之地
荆棘生焉宴樂之場戈矛興焉閱世旣久乃歎清
泉白石冷淡中得大自在也悔翁詩云早知世路
隘不及山中寬

同上

先生論詩云細比老蠶初引緒健如強弩突迴潮
開來謹候鑪中火衆裏心防水面瓢又云平生怕

拾楊劉唾甘讓西崑號作家又云自笑年來詩
熟每從熟處欲求生誦此數句可以知先生之詩
熟處求生尤爲甘苦深歷之語同上

標題 漢口 麻陽田家 入牖 寒食行 三

峽橋 憎蠅 大通舟中看雨 兒建北

上詩以示之 秋感六首 送女詞二首

讀莊子八首 古詩四章俱五古

洪武銅砲歌 送王阮亭祭告南海 開

口觀醫魚者 夾馬營 酬別許陽谷

二虎歌 五老峰觀海鯨歌 王文成紀

功碑 題崔白健翮鏖風圖 宣德素鼎

歌 壽山石歌 高斯億畫竹 題初白

巷圖 額勒蘇臺大獵 貫休畫羅漢

題淳熙修內司官帖後 五更鷹窠頂觀

日出 嚴陵釣臺 平蠻歌俱七古

摘句 天淵星如墜江空月最先

客久人情覺春寒酒力消

人投會宿店鼠瞰未吹燈

遠火欲投吓孤城將掩門

讀書新得少見夢故人多

用巫真下策勿藥得中醫

四海誰知己餘生又哭君

神仙如可學大抵屬多情

一姓興亡際忠臣尙力爭百年公論定兩

字品名成

方文正景忠烈兩公祠

與爾未曾經遠別得歸難定是何年

偶到不妨頻問俗旣來何苦又思家

孤蹤黯澹成千里一信蹉跎到半年

好官氣色車裘壯獨客心情故舊疑

座中放論歸長悔醉裏題詩醒自嫌

含意每爲知己盡不才真怕受恩多
評疎更事多成悔身賤依人自覺輕
新書著罷從人笑善病同時得婦憐
語雜談諧皆典故老傳著述豈初心
詩貪記憶關心讀話到蒼涼制淚聽
十年失計仍爲客一醉無名特借花
夜似小年寒漸信病非一日老方知
哭有餘哀何日盡死無畱憾古來難
每憶兒時纔轉瞬不談舊事怕傷神
自入鹿門詩一變竟馴龍性易初爻

百家小聚還成縣三面無城獨倚山
一雁下投天盡處萬山浮動雨來初
牛羊白散千屯雪草木青回萬竈烟
四山雷轉車聲外萬帳燈浮水氣中
更上一層宜有閣特開西面爲看山
田橫客已辭窮島樂毅功難敵謗書
鮑叔有情貧敢諱向平多累出偏遲
龍門傳裏張丞相淇澳詩中衛武公
宮中詩句元才子天下神仙李鄴侯
共傳清節胡威絹自有家風趙抃琴

贊皇世業平泉記樞密新堂畫錦詩

星漢文章唐許國臚雲名第宋安陽

家承曲阜先師學郡領陶唐古帝都

親老詎應虛子職天高原自近人情

風清李泌神仙骨

帝錫張華博物

名

壽朱竹垞自註研經博物御書賜竹垞匾額也

鄉風未敢分僚友家祭先應薦祖宗

羊鹿賜

燥濕推恩慚厚庇短長稱意荷終身

雨衣賜

炎涼氣隔無三伏覆載恩深抵萬間

官房賜

循環豈易充臣數祝聖惟當轉佛名

數賜

丹青妙合將軍畫聲價高踰都護驄

馬賜

今日重蒙

天一笑白頭還戀舊青

瑣

雪中戴青瑣大帽

上顯見大笑口占紀之

直廬並候花磚影奏帖常聯紙尾名

同槽甌馬無嘒嚙典謁家僮互使令

赤幟千人爭趙壁火牛百道走燕軍危時

莫以烽爲戲我意方憂玉亦焚

夜觀山燒

國手圍棋分黑白村兒鬪草計輸贏轉頭

一笑全無爲不解當場抵死爭

蟻鬪

誰云解脫非生理始信飛鳴是後天從此

塘螂無攫意機心不上七條絃

蟬蛻

得免徒行猶有愧更爭先路欲何求冗官

只算騎驢客老向天街閱八騶

乘驢車

未免情多絲宛轉爲誰心苦竅玲瓏雲烘

日炙如相試賴是清涼不待風

荷花

高士累朝多合傳佳人絕代少同時

菊瓶插梅

倒篋易償鄰叟值顧名原合腐儒餐

豆腐

風露一天人擁被櫓枝搖夢過春江

春波門外春帆影君是還家我別家

眼前看是尋常事或有人從異日傳

王式丹

字方若號樓村江南寶應人康熙四十二年

賜進士第一人官修撰有樓村集

殿撰積學嗜古久躋名場年幾六十始登賢書空

能以第一人自奮士論榮之

國朝名
家小傳

摘句 達人飽世味其中自冰雪

周室職方傳舊志漢家年表效橫書

帝位安危操上策外藩影響戮孤忠

于忠肅墓

蔣廷錫

字揚孫號西谷一號南沙江南常熟人康熙四十

二年進士官至大學士諡文肅有青桐軒諸集

詩壇畫苑合擅爲難先生實兼二美

國朝名家小傳

文肅性豪爽周恤親舊不少吝

賜第外田宅無所增

御書扁額萬幾賢輔無愧色云

荻汀錄

南沙花卉多用逸筆風神生動點綴坡石無不超

脫其有設色極工者多馬氏父子代作

畫傳編韻

摘句 一角國分唐土地百年廟共宋山河

表忠觀

輕烟未散月未上放鶴亭邊雪欲來

張自超

字彝歎江南高淳人康熙四十二年進士

春秋宗朱辨義張自超撰參考經傳務求心得方

苞作春秋通論多取材此書

四庫提要

徐公元夢荐於朝以翰林徵入卒于途次

江蘇詩徵

摘句 能貴不能賤遂爲物所攻

遜非聖賢心剥猶天地德

何焯

字岷瞻號義門江南長洲人康熙四十二年

特賜進士官侍講學士

義門讀書記蔣維鈞編其師何焯校正諸書之交

也考證皆極精密其兩漢書及三國志乾隆五年

禮部侍郎方苞校刊經史頗採其說云

提要四庫

聖祖東巡駐涿州李文貞公時撫直隸迎謁道左

上從容問野有遺賢平公以何焯對既

召試遂直

南書房

集虛齋文集

摘句 一馬尙能龍變化千門誰使草縱橫烏衣

巷陌尋常在可是夷吾浪得名

金陵懷古

吳廷楨

字山掄江南長洲人康熙四十二年進士官翰林

院學士有南村集

吳廷楨中丙子北闈以冒籍革康熙三十八年奏

聖祖南巡廷楨獻詩

上覽而稱善命登

御舟賦詩

賜韻三江廷楨賦詩云綠波潏灩照船窗

天子歸來自越邦忽聽鐘聲傳刻漏計程今已到吳江賦

畢進呈

天顏有喜

恩命復還舉人當廷楨之賦詩也已得首二句而思不能

屬窘甚忽聽自鳴鐘聲即景生情而詩乃就好事

者戲呼自鳴鐘為救命鐘

柳南隨筆

戊子充江西主考李穆堂紱實領解云

國朝名家小傳

摘句 寒松翠滴仙人掌晴雪光浮玉女盆

華嶽

城晚角聲通晉塞關寒樹色鎖秦封

兩谷關

吳瞻淇

字漪堂江南歙縣人康熙四十二年進士官翰林

院庶吉士

先生不以詩鳴而天然溫厚如其為人

國朝詩別裁

摘句 中天一片月千古兩高人世亂宜晞髮時

平亦潔身

夜次嚴灘 自註嚴子陵祠對謝皋羽墓

夢來乘夜月詩好代家書

章藻功

字豈績浙江錢塘人康熙四十二年進士官翰林院庶吉士有思綺堂集

楊雍建序曰豈績非獨文章之士其事親也孝其事兄也恭其與人也誠

江蘇詩徵

駢體文當取風骨於漢魏取姿韻於六朝乃能遠俗章豈績思綺堂集可謂工巧圓熟而不得爲駢

體正宗以是知文章貴取法乎上也

松心日錄

摘句 十戶中人產花燈一夕看

也知避俗須高隱不信辭家可救貧

王霖

字雨豐號弇山浙江山陰人康熙四十四年舉人

官南宮知縣有弇山詩鈔

弇山老人宗仰放翁卷帙之富亦復相似

越風

試鴻博日霖與徐笠山聯席笠山不工爲排律卽

用霖詩爲考官所糾部議徐革職王罰俸

詞科掌錄

摘句 生及宣和無事日死猶垂涕中興年

陸放翁

千古江山風月我百年身世去來今

風毛雨血呼鷹地雪暗雲黃殺虎天

自悔從前三不戒豈知垂老一無能

劉青藜

字太乙河南襄城人康熙四十五年進士官翰林

院庶吉士有高陽山人集

太史通籍彌刻苦自厲乞假後補官旋卒

詩別裁國朝

摘句 今生不盡團圓樂那有來生未了因

此先寄

弟芳草太史詩也太史得詩即乞假歸今誦此二句令人增友于之愛

王萃

字秋史號蓼谷山東歷城人康熙四十五年進士

官敘授有二十四泉草堂集

秋史嗜古好奇閉門苦吟詩骯髒有奇氣

漁洋文略

摘句

亂泉聲裏誰通屐黃葉林間自著書

黃葉下時牛背晚青山缺處酒人行

百年竟落書生手滿郡猶呼閣老亭

葦屋

田蒙齋云望水泉列第二十四明殷棠川相國築川上精舍于此今王生數椽在焉

方槩如

字文暢號朴山浙江淳安人康熙四十五年進士

官豐潤知縣有集虛齋集

散體之文頗興勁有筆力然喜雕琢新句襲積古

辭遂流爲別派

提調席

經史淹洽以古文雄於東南

詞科掌錄

摘句

貧應工學儉病莫苦耽書

寄弟

形容催我老辛苦共誰嘗

寄內

貧家苦趣多男子樂府傷心病婦行

坐守庚申憐影隻重來甲子當生初

陳厚耀

字泗源江南泰州人康熙四十五年進士官翰林

院編修

安溪李光地薦厚耀通律法

上問厚耀曰汝能測北極出地高下否對曰若將儀器測景長短用檢八綫表可得高度此在春秋二分所測則然若餘節氣又有加減之異然亦不准何也臣聞地上有朦氣之差以人目視之有升卑爲高映小爲大之異故以渾儀測之多不合但在天度數則不差也又問地周三百六十度依周尺每度二百五十里今尺二百里地周幾何地徑幾何奏云依周尺地周九萬里今尺七萬二千里以圍三徑一推之地徑二萬四千以密率推之當得地徑二萬二千九百一十八里有奇

上復問地圖出何書對以周髀算經曾言之問何以見其
圓也對曰職方外紀西人言繞地過一周四匝皆
生齒所居故知其爲圓且東西測景有時差南北
測星有地差皆與圓形相合故益知其爲圓

上命厚耀與梅穀成竝修書書成

特授翰林院編修

時人傳

摘句 萬派寒潮飛匹練半天花雨灑明珠

釣突泉

稽曾筠

字松友號禮齋江南無錫人康熙四十五年進士
官至大學士諡文敏有師善堂集

官傅總督河道累用引河殺險之法生平功業治

水爲大著防河奏議

江蘇詩徵

擢都察院左僉都御史出撫中州隨奉

特旨卽于本省典試

槐廳載筆

標題 五臺山

七古

摘句 子儀起汾陽先生可以退季真歸鑑湖先

生可以醉

太白酒樓

何深

字頃波廣東連平人康熙四十五年進士官扶溝
高苑長沙知縣有晴窗出塞等集

同年友王君全才宰長寧病篤馳書托後事先生
兼程赴傾囊辦棺衾王君虧缺公項二千餘遍募

同人補苴俾遺孤扶櫬還楚

國朝詩精華

摘句 出戶雲畱客回頭石認人

波定星依漿灘喧雨到村

萬馬龍驤雲結陣千駝魚貫月連營

齊喇穆台

吳麟

字子瑞號晚亭滿洲人康熙四十七年舉人官中
書有黍谷山房集

乾隆丙辰薦舉博學鴻詞與修明史綱目

雅頌

摘句 怪石削成天際路寒泉流出洞中雲

濟時技拙聊行藥學古疑多敢著書

繆沅

字湘芷江南泰州人康熙四十八年

賜進士第三人官至刑部侍郎有餘園詩鈔

司寇視學楚中延名流校閱得人極盛

國朝詩別裁

雍正六年調刑部侍郎疏陳鹽政事宜設官坵以

靖私販設水程單以便商運定檄引處分杜營

勒索復分司運判之職以專責成

沿海英雲集

標題

王孝子詩

五古

房中詩

七古

摘句 卓哉柴桑叟述古何慙勲獨立烈烈中
然古冠巾飲酒乃寓言所念義皇人

張大受

字目容江南嘉定人康熙四十八年進士官翰林
院檢討有匠門詩文集

吳中宏獎風流斷推匠門今沒世已久過其故居

者猶想望餘風焉

國朝詩別裁

摘句

才輸公瑾捷道契武侯深

魯肅廟

三年皮骨空人役千載文章奈命何

惠士奇

字仲孺一字天牧號半農江南吳縣人康熙四十八年進士官翰林院侍讀有半農人詩

易說惠士奇撰是書專宗漢學以象爲主

提要四庫

禮說惠士奇撰士奇此書於古音古字皆爲之分別疏通使無疑似復援引諸史百家之文或以證明周制或以參考鄭氏所引之漢制以遞求周制而各闡其制作之深意在近時說禮之家持論最

有根柢

同上

先生年十二卽能詩有柳未成陰夕照多之句爲先輩所賞二十一爲諸生不就省試或問之曰

中無書焉用試爲乃奮志力學晨夕不輟嘗與
流宴集有難之者曰聞君熟史漢試爲誦封禪
先生朗誦終篇不遺一字衆皆驚服國朝漢
學師承記
先生督學廣東以經學倡訪諸輿論有海陽進士
翁廷資其學品勝校官之任具疏題補韶州府教
授吏部以學臣向無題補官員之例格不行

世宗特旨惠士奇官聲好所舉之人諒非徇私著照所請
後不爲例任滿還都粵人設木主配食先賢同上

標題 牧童詞 樵客行 田家行俱七
古

摘句 鷓鴣知歲暮鷓鴣訴冬寒廣州
書懷

白猿終霸越黑犬竟亡吳

姑胥

鯨眼常明無月夜鰲身能使不帆風

萬丈峰頭餘故壘千秋猶說李摩雲

張照

字得天江南華亭人康熙四十八年進士官至刑

部尙書諡文敏

張涇南司寇墜馬傷右臂幾折時方進呈落葉倡

和詩遂用左手書楷凝厚蘊藉無一筆呆滯真造

化手也時得蒙古良醫百日全愈

茶餘客話

摘句

乾坤浮一氣今古浸雙丸

硯海

乍離還道明明在欲說翻成漸漸消

秦道然

字雒生江南無錫人康熙四十八年進士官翰林院編修有泉南山人稿

泉南先生詩無理語有理趣

國朝詩別裁

摘句 山齋寂寂元鳥初來春風融融林花乍開
共二三子撫景銜杯從容詠歌吾師點哉

李紱

字巨來號穆堂江西臨川人康熙四十八年進士官至戶部尚書有穆堂類稿續稿別稿

公攝吏部侍郎以辛丑校士之役被論罷官

世宗知公召還復其官時有密勿重臣二人公平揖之重

臣言公賦性剛愎難共事

結琦亭集

新任直督及廣撫交章劾公初公在廣撫任嘗安
插一罪苗至是逃去新廣撫劾公從前措置不善
詔使公往捕賊自贖人皆危之公至而叛苗束身自歸曰
吾不可以負李公其事得解時公已削官既歸下
刑部大臣議公應斬罪六獄成公在囚中日讀書
若不知有憂患者時故甘撫胡君期恆亦以事在
繫歎曰真鐵漢也尋奉

詔赦公令纂脩八旗志書

同上

公以原官致仕卒年七十八公釋褐時新城王尙
書稱公有萬夫之稟公博聞強識落筆滾滾千言
著有春秋一是陸子學譜朱子晚年全論

同上

摘句 平生悔用壯年來成漫叟

上壽千秋鑑談經七寶牀

張文獻祠

荒岡曉趁牛羊路逆旅寒依虎豹村

夕陽千樹鳥聲寂涼月一庭花影深

方式濟

字沃園江南桐城人康熙四十八年進士官中書

舍人

中翰隨考臯宗水部居塞上服勤左右著五經一

得未成卒後以子問亭宮保貴贈如其官

詩國朝別裁

標題

蜀錦曲

七古

隴頭水

七古

摘句

勿謂百年短計日不爲少憂更多於日忽

忽憂中老

呂謙恆

字天益河南新安人康熙四十八年進士官光祿

寺卿

其詩純作宋格疎爽有餘頗傷樸直

四庫提要

甲辰順天鄉試先生以戶科充同考官子燦曾以
主客爲同考官父子同闈分校時論榮之月樓集
摘句 雪峰藏白日雲谷束青天

雞鳴半夜騰潮日鐘落層霄響澗風登岱

張景崧

字岳維江南吳縣人康熙四十八年進士官樂亭
知縣有鍛亭詩稿

鍛亭論詩謂與其爲假王孟不如爲淺溫李以王
孟可僞爲溫李不易僞爲也國朝詩別裁

標題 弄潮兒歌七古

摘句 細雨殘鐘荒驛夢斜陽衰草故人墳

王時憲

字若干江南太倉人康熙四十八年進士官翰林院檢討有性影集

蕭山毛氏極誇其擬十九首擬陶擬杜等作愚所

取者轉在自出新意之篇

江蘇詩徵

摘句 青山兩岼尋詩路黃葉孤村賣酒家

鬢將如鶴頻看鏡松欲成龍尙著書

梁 迪

字道始廣東新會人康熙四十八年進士官山

平陸屯畱知縣有茂山堂集

先生以名進士起家政事卓卓平陸屯畱人俱不

今尸祝及拂衣歸臥江門以詩酒自娛

國朝詩精華

夏令節氣值鬼宿俗謂鬼打節必有颶風颶多作

於東北由南而西乃息梁道始颶風歎云鬼宿值

節殊有徵又云四風不全勢不極信然

聽松廬詩話

摘句 短籬扶豆葉矮屋上瓜苗

越裳翠羽無畱影漢將紅梅有剩花

梅關

國朝詩人徵略卷十九